

DOMINGU XXXI TEMPU KOMÚN – TINAN C

Tema

Liturjia domingu ne'e nian konvida ita atu kontempla Maromak nia domin. Nia apresenta Maromak ida ne'ebé hadomi nia oan hodi la esklui ema ida, inklui ema maksalak sira, ema aat, ema marjinal sira, ema “foer” sira; no hatudu oinsá domin de'it mak bele transforma no hamoris ema.

Iha *leitura dahuluk* “matenek-na'in” ida Israel nian esplika “moderasaun” ne'ebé Maromak uza hodi trata opresor Ejitu nian. Moderasaun ne'e hatudu lójika ida domin nian: Maromak kbiit-na'in ne'e, ne'ebé hakiak buat hotu, hadomi hanesan aman ida kriatura hotu sai husi nia liman maski ema sira-ne'e mak opresór sira, maski sira mak Ejitu nia oan sira, basá hotu-hotu mak nia oan.

Evanjellu apresenta istória ema maksalak ida nian, marjinalizadu no desprezadu husi ninia maluk sira, ne'ebé deskobre Jezús no haree iha Nia Maromak domin-na'in nia oin... Simu tiha konvite ba meza “Reinu” nian, ema egoísta no aat ne'e husi atu Maromak nia domin transforma nia no sai ema laran-luak ida, ho kbiit atu fahe ninia soin sira no laran sadia ba ema kiak sira.

Leitura daruak halo referénsia ba Maromak nia domin, hodi releva ninia papél iha ema nia salvasaun (husi Nia mak mai bolun dahuluk ba salvasaun; Nia akompaña ho domin ema nia dalan loroloron nian; Nia haraik ba ema iha moris nia rohan moris nakonu)... Aleinde ne'e, nia aviza fiar-na'in sira atu keta husik fantazia fanátiku sira-nian manipula sira, atu atrapalla ema sarani normál nia dalan.

LEITURA I – Sab 11,22-12,2

“Livru Sabedouria” nian mak livru resente liu Testamentu Tuan nian (primeira metade sék. I mK). Autór mak judeu ida Diáspora nian (Alexandria?) – halo elojiu ba “sabadouria” israelita, no fô sai sorte ne'ebé sei kona ema justu no ema aat no hodi foti ezemplu husi istória Ézodu nian hatudu sorte ne'ebé ema Ejitu hetan (idólatra sira) no ebreu sira nia sorte (fiél ba Jahwéh). Nia iha objetivu rua: dirije ba maluk judeu sira iha mundu paganizmu, idolatria no imoralidade nian), nia konvida sira atu deskobre fali bei-ala sira nia fiar no valór judaiku sira; dirije ba pagaun sira, nia konvida atu kontra idolatria no adere ba Jahwéh, Maromak loos no mesak... Ba sira hotu, nia hateten katak, Jahwéh de'it mak garante “sabadouria” loos, ksolok loos.

Testu ohin propoin mai ita pertense ba parte datoluk livru nian (kf. Sab 10,1-19,22). Hodi uza téknika midrash nian, autór halo komparaun entre kastigu sira Maromak lansa kontra “ema aat sira” (pagaun sira) no salvasaun ba ema “justu sira” (Maromak nia Povu).

Haktuir tiha Maromak nia “sabadouria” iha istória Israel nian (kf. Sab 10,1-11,14), autór halo referénsia ba ema Ejitu sira-nia salan, be adora balada sira ne'ebé la iha hanoin (Sab 11,15); no nia hatudu ninia admirasaun katak Maromak nia kastigu ba ema Ejitu sira mamar hela (kf. Sab 11,17-20). Tanba sá Maromak la hamohu ema Ejitu tomak? Ne'e mak kestaun ne'ebé testu ne'e hatán.

MENSAJEN

Fundamentalmente, autór hetan razaun tolu atu justifika Maromak nia moderasaun no laran-sadia.

Ida, liga ho Maromak nia kmanek no kbiit tomak (kf. Sab 11,22). Ida ne'ebé boot no kbiit-na'in, la sente inkomoda eh preokupa ba sira ne'ebé ki'ik no kbiit la iha... Maromak haree sasán husi dook, komprende razaun sira ema nia hahalok nian, la lakon “fair play”; husi ne'e mai toleránsia no laran-sadia.

Razaun daruak mai husi lójika ne'ebé karakteriza nafatin Maromak nia atitude hasoru ema: lójika perdaun nian (kf. Sab 11,23). Nia lakohi ema maksalak nia mate, maibé atu nia konverte no moris; tanba ne'e, Nia “taka matan” ba ema nia salan. Atu nia konverte ba arrependimentu... Lójika ne'e nia atua ba impériu pagaun no opresór ida: ne'e mak universalidade salvasaun nian.

Razaun datoluk mak Maromak nia domin (kf. Sab 11,24-26), ne'ebé suli ba kriatura tomak. Kriasaun mak aman ida nia liman-fatin; no aman ne'e hadomi nia oan sira hotu. Nia mak Na'i ne'ebé “hadomi vida”.

Tanba ema hotu lori iha sira nia an “anin moris nian” ne'ebé Maromak huu iha kriasaun tomak, mak Nia preokupa, korrije, fó hanoin, perdua falta sira, halo atu sira hadook an husi aat no estabelese komuñau ho Nia (kf. Sab 12,1-2).

LEITURA II – 2 Tes 1,11-2,2

Paulo tenke husik Filipos, no bá Tessalónica iha tinan 50. Tuir ninia lisan, nia haklaken uluk ba judeu sira iha sinagoga, hodi hetan susesu ruma; maibé judeu sira – inkomodadu ho Paulo nia sasin – sukut ema lubun-boot sira atu kontra Paulo, nune'e nia tenke husik lalais sidade ne'e. Husi ne'ebá nia bá Bereia, Atenas no, hafoin, Corinto.

Iha Tessalónica nia hela iha comunidade entuziasta no fervoroza ida, ne'ebé maioria pagaun sira ne'ebé konverte an... Maibé Paulo la hakmatek, tanba nia rona kona-ba judeu sira nia hafunu hasoru sarani sira Tessalónica nian; no comunidade ida-ne'e, seidauk simu katekeze natón, ho fiar ne'ebé sei “matak” liu, hasoru perigu... Paulo haruka Timóteo bá Tessalónica, atu hatene notísia no enkoraja sarani sira... Bainhira Timóteo fila, Paulo iha hela Corinto. Nia simu notísia di'ak: ema Tessalónica kontinua moris iha entuziazmu fiar nian no fó sasin kona-ba Jezús. Iha de'it kestaun ruma doutrina nian ne'ebé preokupa nia, katak kona-ba Na'i nia fila-hikas ba dala rua. Entaun, Paulo deside atu hakerek ba sarani sira Tessalónica nian, hodi anima sira atu moris iha fidelidade ba Evanjellu no esklaresé doutrina kona-ba “Na'i nia laron”. Ita iha tinan 51.

MENSAJEN

Testu ne'ebé propoin mai ita apresenta tema rua. Primeiru (kf. 2 Tess 1,11-12) haktuir Paulo nia lia-menon, atu ema Tessalónica sira nia moris hatudu duni katak Maromak bolu sira; segundu (kf. 2 Tess 2,1-2) refere ba Na'i nia fila-hikas.

Parte dahuluk hatudu papél protagonista Maromak nian iha ema nia salvasaun. La to'o ema nia hakaran di'ak no ema nia propózitu di'ak sira; presiza atu Maromak akompaña fiar-na'in sira nia esforsu atu nia iha kbiit atu la'o to'o rohan iha dalan Evanjellu nian. Buat hotu mak Maromak nia don, ne'ebé habiit no gia ema to'o iha ninia meta.

Parte daruak mak inísiu doutrina kona-ba “Na'i nia laron”. Intensaun fundamentál Paulo nian mak denuncia kona-ba ema fanátiku balun no nakonu ho fantazia ne'ebé, hodi haktuir vizaun ruma eh hakerek surat hodi Paulo nia naran, haklaken katak mundu nia rohan to'o daudaun

ona... Hahalok sira-ne'e provoka perturbasaun iha comunidade, halo atu ema balun – tanba hanoin Na'i besik daudaun ona iha Ninia fila-hikas ba dala rua, la halo ona sira nia responsabilidade no hein ho ansi akontesimentu ne'e.

EVANJELLU – Lc 19,1-10

Epizódiu ohin nian koloka ita iha Jericó, rai-oázis iha Tasi Mate [mar Morto] nia ninin, besik kilómetru 34 husi Jerusalém. Ne'e mak etapa ikus peregrinu sira-nian ne'ebé, husi Pereia no Galileia, bá Jerusalém atu selebra festividade boot sira kultu judaiku (no ne'e hatudu katak “dalan Jerusalém nian”, atu to'o ona nia rohan).

Iha Jezús nia tempu, Jericó sidade próspera ida (liuliu ba produsaun bálsamu), ho jardín boot no furak no palásiu sira (tanba Erodes, halo Jericó sai ninia rezidénsia invernu nian). Nia pozisaun sai fatin oportunidade nian ba komérsiu oioin.

Personajen ne'ebé iha Jezús nia oin, mak publikanu ida tan (xefe publikanu nian). Judaízm u ofisiál konsidera nia ema maksalak públiku, esploradór ida ema kiak sira-nian, kolaborasionista ba opresór romanu sira nune'e, esklu ihusi comunidade salvasaun nian.

MENSAJEN

Tema ida ne'ebé Lucas gosta liu mak ne'e: Jezús mak Maromak ne'ebé mai hasoru ema no halo an sai ema atu lori, ho jestu konkretu, libertasaun ba ema hotu – liuliu ema sira ne'ebé doutrina ofisiál tau iha ninin.

Zaqueu ne'ebé uza nia kargu atu sai riku ho modu imorál mak ema maksalak públiku ida, la soi perdaun no esklu husi konvíviu ho ema di'ak sira. Nia mak ema marjinál ida, hetan konsiderasaun nu'udar simu malisan husi Maromak no desprezu husi ema sira. Referénsia kona-ba ninia estatura ki'ik (ain-badak) – liufali indikasaun ho karákte r fíziku – bele signifika mós ninia moris sabraut, insignifikante, ki'ik husi pontudevista morál.

Mane ne'e buka “haree” Jezús. “Haree” iha ne'e hatudu, liufali kuriozidade, ninia babukak ho laran-manas, vontade firme enkontru nian ho buat ruma foun, ánsia atu deskobre “Reinu”, hakaran ida atu halo parte comunidade salvasaun ida-ne'e ne'ebé Jezús haklaken. Maski nune'e, nia sente “mestre” dook husi nia, ema “moos no santu” sira ne'ebé despreza ema hanesan Zaqueu mak besik nia. Sa'e “ai sikómoru” hatudu ninia hakaran nia intensidade enkontru nian ho Jezús, ne'ebé forte liu ninia ta'uk atu hamoe an eh ema lubun-boot sira nia losu matan.

Oinsá Jezús lida ho ema eskluidu ne'e nia hakaran boot atu hatene Maromak nia salvasaun no hafuhu Jezús husi ai-hun leten? Jezús hahú hodi provoka enkontru; hafoin, husu Zaqueu ne'ebé iha interese atu tama iha komuñau n ho Nia, atu estabelese ho Nia tali familiaridade nian (“To'o tiha fatin ne'ebá, Jezús foti matan hodi dehan: “Zaqueu, tun mai lalais, basá ohin Ha'u sei hela iha o nia uma”). Ita nota momentu ne'e: Jezús ho ema santu sira hale'u nia ne'ebé rona ho atensaun ba ninia Liafuan, nia husik sira hotu iha lurón klaran no para atu hahú kontaktu ho ema maksalak no tama iha ninia uma. Ne'e mak ezemplu práti ku “husik bibia sianulu-resin-sia atu bá buka bibi ne'ebé lakon”... Iha ne'e ita haree MARomak nia fuan ne'ebé mamar bainhira hasoru ema maksalak ne'ebé buka salvasaun, husik buat hotu atu bá hasoru nia.

Oinsá mak ema lubun-boot ne'ebé hale'u Jezús reajen ba buat ne'e? Konserteza hodi hatudu sira-nia dezaprovasaun ba Jezús nia atitude sira (“Haree tiha ne'e, sira hotu hamuu, dehan: “Nia tama iha maksalak ida nia uma!”). Ne'e mak atitude ema sira ne'ebé hanoin sira mak justu eh santu no despreza ema seluk, ema sira ne'ebé hanoin katak Maromak nia lójika mak kastigu nian, marjinalizasaun nian, eskluzaun nian. Jezús fali hatudu katak Maromak nia

lójika diferente husi ema sira nia lójika no katak Maromak nia salvasaun oferese ba ema hotu no la esklui ema ida.

Oinsá mak buat hotu remata? Remata ho festa han-hemu (iha Zaqueu nia uma, xefe ema publikanu sira-nian) ne'ebé simboliza han-hemu Reinu nian. Hodi aseita tuur iha meza ho Zaqueu, Jezús hatudu katak ema maksalak sira hetan fatin iha “festa Reinu nian”; ba sira Nia hateten katak Maromak hadomi mós sira, aseita atu tuur ho sira iha meza – katak hakarak integra sira iha ninia família no estabelese tali komuñau no domin ho sira. Jezús hatudu katak, Maromak la esklui no la marjinaliza mós nia oan sira ida – maski sira ema maksalak – maibé oferese salvasaun ba ema hotu.

Oinsá mak Zaqueu reaje ba oferta salvasaun ne'ebé Maromak halo ba nia? Hosi simu Maromak nia prezente no konverte an ba domin. Fahe nia rikusoin sira ba ema kiak no fó fila dala haat buat hotu ne'ebé nia naok, hakat liu buat ne'ebé lei judaika ezije (kf. Ex 22,3.6; Lev 5,21-24; Nm 5,6-7) no ne'e sinál transformasaun iha Zaqueu nia fuan... Zaqueu deside atu sai laran-luak depoizde enkontru ho Jezús no halo esperiénsia kona-ba Maromak nia domin. Maromak nia domin la mai ba Zaqueu depoizde nia troka nia moris; maibé Maromak nia domin – ne'ebé Zaqueu esperimenta bainhira nia sei ema maksalak – mak provoka konversaun no nakfilak ninia egoízmua iha laran-luak. Ne'e mak prova katak ho de'it lójika domin nian mak bele nakfilak mundu no ema sira nia fuan.